

S A "S E R R A" D E ' I D D A N O A

Affacc'a Biddanoa, b'est sa "Serra"...
ite furtana hat tentu bidde mia!
Oh! generosu Deus, ipsa ebbia
has preferidu, subra custa terra!

Est una rocca a monte 'e s'adde manna
inue su Temo falat minoreddu,
alta, t'apparit, simile a casteddu,
o de su Chelu sa lizadra janna.

Ite no s'idet subra custa altura!...
s'ilde campagna ricca tataresa,
nos montes de sa Corsica franzese,
sa Nurra, s'Asinara, sa Gallura.

Dae s'ater'ala, de palas a bentu,
ammiras Biddanoa, bella meda,
Minerva, Rocca Doris, sa Campeda,
eppuru Monte Rasu e Gennargentu!

A manzanile, cando dae Limbara
s'accherat s'astru mannu de sa vida,
podes cumprender qui no s'est mai bida
una grandiosidade tantu rara!

Ma camil' a sero s'est battendhe in mare
tota s'iscena accroschet de isplendore,
immensu fogu azzesu in pien'ardore
ti paret in su sonnu de ammirare!

Sa rocca 'e Cabu Cazza e Portu Conte,
Scala Piccada subra s'Alighera...
no! no ti paret una cosa vera
coment'est coloridu s'orizzonte!

Intendhes un incantu mai proadu,
t'abbizas qui ti mancat su respiru,
abbaidas in silenziu tot'in gira,
a Deus ringraziandhe, imbenujadu...

Pigat dae s'adde boghe de pastore:
est unu cantu dulce, dilicadu,
una promissa de coro donadu,
un'innu veru de sinzeru amore.

Un abilastru bolat que unu lampu...
tunciat sa tonca, appeddad sa catedda...
josso, in sa balza, cantat sa pixedda...
puzones faghent coru in dogni campu.

Podes "serrare" asshora su "balcone",
sos ojos pienes de sa vista bella,
ammira como sa lughente istella,
e a mesa 'oghe, intona sa cantone...

No ses pius solu, cantigu de OSANNA
dae Chelu falat tando in cust'altura...
cantu in Sardigna hat fattu sa Natura
effacc'a bidde mia... est cosa manna!

Bastià Pirisi

Bastià Pirisi - VILLANOVA MONTELEONE